

ՀԱՍՏԱՏՎԱԾ Է
«Հայաստանի ավտոապահովագրողների բյուրո»
ԻԱՄ խորհրդի
29/12/2010թ թիվ 44-Լ որոշմամբ

Փոփոխված է 04/02/2011թ թիվ 15-Լ որոշմամբ

«Հայաստանի ավտոապահովագրողների բյուրո»
ԻԱՄ խորհրդի նախագահ

----- Անդրանիկ Նորեկյան

ԳՐԱՆՑՎԱԾ Է
(վերջին փոփոխությունը գրանցված է)
ՀՀ կենտրոնական բանկում

«----» ----- 2011թ
ՀՀ կենտրոնական բանկի նախագահ

----- Արթուր Չավադյան

ԿԱՆՈՆՆԵՐ RL 1-018

«ՀԱՅԱՍՏԱՆԻ ԱՎՏՈԱՊԱՀՈՎԱԳՐՈՂՆԵՐԻ ԲՅՈՒՐՈ» ԻՐԱՎԱԲԱՆԱԿԱՆ ԱՆՁԱՆՑ ՄԻՈՒԹՅԱՆ

(«ՀԱՅԱՍՏԱՆԻ ԱՎՏՈԱՊԱՀՈՎԱԳՐՈՂՆԵՐԻ ԲՅՈՒՐՈ» ԻԱՄ ԿՈՂՄԻՑ ԵՐԱՇԽԱՎՈՐՄԱՆ ՖՈՆԴԻ
ՄԻՋՈՑՆԵՐԻ ՀԱՇՎԻՆ ՀԱՏՈՒՑՈՒՄՆԵՐԻ ՎՃԱՐՄԱՆ)

ԲԱԺԻՆ 1

ԸՆԴՀԱՆՈՒՐ ԴՐՈՒՅԹՆԵՐ

ԳԼՈՒԽ 1

ԿԱՐԳԱՎՈՐՄԱՆ ԱՌԱՐԿԱՆ

1. Սույն կանոններով սահմանվում են ԱՊՊԱ ոլորտում Բյուրոյի կողմից Երաշխավորման ֆոնդի միջոցների հաշվին հատուցումների կազմակերպման ընդհանուր սկզբունքները, առանձին տեսակի վնասների գծով հատուցումների տրամադրման ընթացակարգերը և պայմանները, տուժողների առողջությանը պատճառված վնասների հետ կապված ծախսերը հավաստող փաստաթղթերին ներկայացվող նվազագույն պահանջները (որպես հատուցման ենթակա ծախսերի անհրաժեշտության, հիմնավորվածության և փաստացի ապացուցվածության չափանիշներ), ինչպես նաև Բյուրոյի կողմից երաշխավորման ֆոնդի միջոցների հաշվին հատուցումների կազմակերպման գործընթացում ապահովագրական ընկերությունների, նրանց մասնաճյուղերի, ներկայացուցչությունների և ապահովագրական ընկերության անունից ապահովագրական հատուցումների կարգավորման իրավասությամբ օժտված այլ անձանց գործողությունները (այսուհետ՝ գործակալ):

ԳԼՈՒԽ 2

ԿԱՆՈՆՆԵՐՈՒՄ ՕԳՏԱԳՈՐԾՎՈՂ ՀԻՄՆԱԿԱՆ ՀԱՍԿԱՑՈՒԹՅՈՒՆՆԵՐԸ

2. Սույն կանոններում օգտագործվող հիմնական հասկացություններն ունեն հետևյալ հիմնական իմաստը՝

1) **Օրենք**՝ «Ավտոտրանսպորտային միջոցների օգտագործումից բխող պատասխանատվության պարտադիր ապահովագրության մասին» Հայաստանի Հանրապետության օրենք,

2) **Բյուրո**՝ «Հայաստանի ավտոապահովագրողների Բյուրո» ԻԱՄ,

3) **Երաշխավորման ֆոնդ**՝ Օրենքի համաձայն Բյուրոյի կազմում ստեղծված ֆոնդ, որի հաշվին Օրենքով և սույն կանոններով սահմանված դեպքերում վճարվում են հատուցումներ,

4) **պատահար**՝ Օրենքի 49-րդ հոդվածով նախատեսված դեպք կամ իրադարձություն, որի դեպքում Բյուրոն պարտավորվում է տուժողին կամ օրենքով նախատեսված դեպքերում այլ անձանց Երաշխավորման ֆոնդի հաշվին վճարել հատուցումներ,

5) **հատուցում**՝ պատահարի դեպքում Երաշխավորման ֆոնդի միջոցների հաշվին Բյուրոյի կողմից՝ տուժած անձանց պատճառված վնասների հատուցում,

6) **ապահովագրական ընկերություն**՝ Բյուրոյին անդամակցող ապահովագրական ընկերություն,

7) **ապահովագրված անձ**՝ վնաս պատճառած և գործադ ԱՊՊԱ պայմանագիր ունեցող ավտոտրանսպորտային միջոցի սեփականատեր կամ տվյալ ապահովագրական պատահարի ժամանակ այն օրինական հիմքով տիրապետած այլ անձ,

8) **փորձագետ**՝ Բյուրոյի կանոնների համաձայն՝ ԱՊՊԱ ոլորտում գույքային վնասների գնահատում կամ պատահարի առաջացման պատճառների փորձաքննություն իրականացնելու իրավունք ունեցող անձ,

9) **Հանձնաժողով**՝ Օրենքի 12-րդ հոդվածի համաձայն՝ Բյուրոյի կազմում ստեղծված Բժշկական հանձնաժողով:

ԲԱԺԻՆ 2

ԲՅՈՒՐՈՅԻ ԿՈՂՄԻՑ ՎՃԱՐՎՈՂ ՀԱՏՈՒՑՈՒՄՆԵՐԻ ԳՈՐԾԸՆԹԱՅԻ ՆԿԱՏՄԱՄԲ ՀԻՄՆԱԿԱՆ ՊԱՀԱՆՁՆԵՐԸ

ԳԼՈՒԽ 3

ՀԱՏՈՒՑՈՒՄՆԵՐԻ ԳՈՐԾԸՆԹԱՅԻ ԿԱԶՄԱԿԵՐՊՄԱՆ ԸՆԴՀԱՆՈՒՐ ՍԿԶՐՈՒՆՔՆԵՐԸ

3. Բյուրոն հատուցումներն իրականացնելիս առաջնորդվում է Օրենքով, սույն կանոններով և Բյուրոյի կողմից սահմանված այլ կանոններով: Սույն կանոններով չկարգավորված հարաբերությունների վրա տարածվում են Բյուրոյի խորհրդի կողմից հաստատված ԱՊՊԱ պայմանագրի պայմաններով նախատեսված դրույթները՝ հաշվի առնելով Բյուրոյի կողմից իրականացվող հատուցման առանձնահատկությունները:

4. Պատահարի հետ կապված լրացուցիչ և (կամ) կրկնակի փորձաքննությունն իրականացվում է Օրենքով և Բյուրոյի կողմից ընդունված կանոններով, այլ ներքին իրավական ակտերով սահմանված դեպքերում, կարգով և ժամկետներում:

5. Կրկնակի փորձաքննությունն իրականացվում է Բյուրոյի կամ տուժողի (նրա իրավահաջորդի) նախաձեռնությամբ՝ Բյուրոյի գործադիր տնօրենին գրավոր պահանջ ներկայացնելու միջոցով: Կրկնակի փորձաքննության անցկացման պահանջ ներկայացվելու դեպքում կրկնակի փորձաքննություն նշանակելու և փորձագետ նշանակելու մասին որոշումն ընդունում է Բյուրոն՝ համապատասխան պահանջը ներկայացվելուց հետո՝ 3 աշխատանքային օրվա ընթացքում:

6. Այն դեպքում, երբ Բյուրոն, ապահովադիրը, ապահովագրված անձը և (կամ) տուժողը Օրենքով սահմանված ժամկետներում լրացուցիչ և (կամ) կրկնակի փորձաքննության անցկացման պահանջ չեն ներկայացնում, ապա Բյուրոն սույն կետով նախատեսված ժամկետի վերջին օրվան հաջորդող օրը ընդունում է գրավոր որոշում հատուցում վճարելու կամ հատուցման վճարումը մերժելու վերաբերյալ:

7. Սույն կանոնների 4-ից 6-րդ կետում նշված դրույթները չեն տարածվում այն դեպքերի նկատմամբ, երբ պատահարի հետ կապված հարուցվել է քաղաքացիական, քրեական կամ դատական կարգով վարչական գործ: Նման դեպքերում Բյուրոն Օրենքով և սույն կանոններով նախատեսված փաստաթղթերը ստանալուց հետո՝ 3 աշխատանքային

օրվա ընթացքում, ընդունում է որոշում հատուցում վճարելու կամ հատուցման վճարումը մերժելու վերաբերյալ:

8. ԱՊՊԱ ոլորտում տեղի ունեցած պատահարների գծով տուժողին (տուժողներին) հատուցում վճարելու կամ հատուցումը մերժելու վերաբերյալ որոշումներն ընդունվում են Բյուրոյի գործադիր տնօրենի կողմից՝ փորձագետների կողմից տրված եզրակացությունների (հաշվետվությունների) կամ գործն ըստ էության լուծող և օրինական ուժի մեջ մտած դատական ակտերի հիման վրա:

9. Հատուցում վճարելու կամ հատուցման վճարումը մերժելու վերաբերյալ Բյուրոյի որոշումը տրվում է յուրաքանչյուր պատահարում ընդգրկված յուրաքանչյուր տուժողի համար առանձին:

10. Հատուցում վճարելու կամ հատուցման վճարումը մերժելու վերաբերյալ Բյուրոյի որոշումը՝ այն կայացնելու օրվանից հետո՝ 3 աշխատանքային օրվա ընթացքում, ուղարկվում է տուժողին (նրա իրավահաջորդին):

11. Հատուցումներն իրականացվում են Օրենքով նախատեսված կարգով և ժամկետներում:

12. Բյուրոն պարտավոր է հատուցումների գործընթացի հետ կապված բոլոր ծանուցումները Օրենքով և սույն կանոններով նախատեսված անձանց հանձնել առձեռն՝ ստացման մասին ստորագրությամբ կամ ուղարկել պատվիրված նամակով՝ հետպատասխան տեղեկացմամբ: Ընդ որում, ծանուցումը պատվիրված նամակով ուղարկելու դեպքում ծանուցված անձի կողմից որոշակի գործողություններ կատարելու համար սահմանված ժամկետները Բյուրոյի կողմից սկսվում են հաշվարկվել Բյուրոյի կողմից հետպատասխան տեղեկացումը ստանալու պահից:

13. Բյուրոն պարտավոր է հատուցումը վճարելու կամ հատուցման վճարումը մերժելու վերաբերյալ իր որոշումից առաջ Տեղեկատվական համակարգից ստանալ և պահպանել տվյալ պատահարի վերաբերյալ ամբողջ տեղեկատվությունը: Եթե հնարավորություն է եղել ստանալ պատահարի վերաբերյալ տեղեկատվություն, ապա Բյուրոն սույն կետով նախատեսված տեղեկատվությունը տուժողին (նրա իրավահաջորդին) կարող է տրամադրել միայն նրան վերաբերող մասով՝ համապատասխան գրավոր պահանջ ներկայացվելու դեպքում, եթե այլ բան նախատեսված չէ օրենքով:

14. Բյուրոն, հատուցման հաշվարկն իրականացնելիս, տուժողին պատճառված վնասի չափից համապատասխան հիմքերի առկայության դեպքում մասհանում է վնաս պատճառած անձի և (կամ) վնասի համար պատասխանատու այլ անձի կողմից տուժողին վճարված գումարները:

ԲԱԺԻՆ 3

**ՀԱՏՈՒՑՈՒՄ ՍՏԱՆԱԼՈՒ ՀԱՄԱՐ ԲՅՈՒՐՈ ՂԻՄԵԼՈՒ ԸՆԹԱՑԱԿԱՐԳԸ,
ԵՐԱՇԽԱՎՈՐՄԱՆ ՖՈՆԴԻ ՄԻՋՈՑՆԵՐԻ ՀԱՇՎԻՆ ՀԱՏՈՒՑՈՒՄՆԵՐԻ ՎՃԱՐՈՒՄԸ**

ԳԼՈՒԽ 4

**ՀԱՏՈՒՑՈՒՄՆԵՐ ՍՏԱՆԱԼՈՒ ՀԱՄԱՐ ԱՆՀՐԱԺԵՇՏ ՓԱՍՏԱԹՂԹԵՐԻ ՑԱՆԿԸ ԵՎ
ԲՅՈՒՐՈ ՂԻՄԵԼՈՒ ԸՆԹԱՑԱԿԱՐԳԸ**

15. Սույն կանոնների 24-րդ կետով նշված դեպքերում հատուցում ստանալու համար տուժողը կամ նրա իրավահաջորդը դիմում է Բյուրո պատահարի օրվանից հետո՝ եռամսյա ժամկետում: Ընդ որում, այն դեպքում, երբ տուժողը կամ նրա իրավահաջորդը պատահարի հետևանքով հայտնվել է անգիտակից վիճակում կամ այնպիսի իրավիճակում, որն անհնարին է դարձրել նրա կողմից Բյուրոյին սահմանված ժամկետում և կարգով հատուցում ստանալու համար դիմելը կամ գույքին պատճառված վնասների առկայության դեպքում՝ այդ գույքի պահպանման համար պատասխանատու անձը (գույքը նրա մոտ գտնվել է այն պահպանելու, օգտագործելու կամ նրա համաձայնությամբ այլ նպատակներով) պատահարի մասին չի տեղեկացրել, ապա նրա համար եռամսյա ժամկետը սկսում է գործել հատուցում ստանալու համար դիմում ներկայացնելն անհնարին դարձնող հանգամանքների վերացման կամ պատահարի մասին տեղեկանալու օրվանից սկսած: Տուժողը կամ նրա իրավահաջորդը կրում են հատուցում ստանալու համար սահմանված ժամկետում դիմելու անհնարինության կամ տեղյակ չլինելու ապացուցման պարտականությունը:

16. Տուժողը (տուժողի իրավահաջորդը) հատուցում ստանալու համար Բյուրո է ներկայացնում հետևյալ փաստաթղթերը.

1) հատուցում ստանալու մասին դիմում՝ համաձայն 2և 1-ի,

2) դիմումը սույն կանոնների 15-րդ կետով նախատեսված ժամկետներում չներկայացվելու դեպքում՝ տուժողի կամ նրա իրավահաջորդի կողմից եռամսյա ժամկետում դիմելու անհնարինության կամ տեղյակ չլինելու հանգամանքները հիմնավորող փաստաթղթեր կամ այլ ապացույցներ,

3) ճանապարհային երթևեկության անվտանգության ապահովման համար պատասխանատու լիազոր մարմնի կազմած արձանագրությունը,

4) տուժողի իրավահաջորդությունը հիմնավորող օրենսդրությամբ սահմանված փաստաթղթեր, եթե Բյուրո դիմել է տուժողի իրավահաջորդը,

5) ներկայացուցչի միջոցով դիմում ներկայացվելու դեպքում՝ լիազորված լինելու փաստը հավաստող փաստաթուղթ,

6) 17-րդ, 18-րդ և (կամ) 19-րդ կետերով նախատեսված փաստաթղթերը և այլ ապացույցները՝ կախված պատճառված վնասի բնույթից:

17. Տուժողի առողջությանը պատճառված վնասների հատուցման համար ներկայացվում են՝

1) դատաբժշկական (բժշկական) փորձաքննության ակտ (եզրակացություն) և (կամ) բժշկական տեղեկանք և (կամ) կոնսուլտացիոն եզրակացություն և (կամ) քաղվածք ամբուլատոր քարտից և (կամ) էպիկրիզ,

2) բժշկական հաստատությունների կողմից տրված՝ վճարման հաշիվներ, իսկ սույն կանոնների 43-րդ կետով նախատեսված դեպքերում՝ կատարված ծախսերը հիմնավորող փաստաթղթեր, մասնավորապես՝ գումարի վճարումը հավաստող բանկային կամ դրամարկղի մուտքի անդորրագրեր, կամ առողջության վերականգնումը տնային պայմաններում իրականացնելու հետ կապված ծախսերը հիմնավորող փաստաթղթեր,

3) տուժողի առողջությանը պատճառված վնասների հետևանքով աշխատավարձի (եկամուտների) կորստի դեպքում՝ կորցրած աշխատավարձի (եկամուտների) չափը հաստատող փաստաթղթեր,

4) տուժողի հայեցողությամբ՝ վնասի չափը և մեղավորությունը հավաստող այլ փաստաթղթեր:

18. Տուժողի մահվան հետ կապված հատուցում ստանալու համար ներկայացվում են՝

1) օրենքի համաձայն տուժողի մահվան հետևանքով վնասների հատուցման իրավունք ունեցող անձ համարվելու փաստը հավաստող փաստաթղթեր,

2) դատաբժշկական (բժշկական) փորձաքննության ակտ (եզրակացություն),

3) մահվան վկայական,

4) տուժողի կողմից հուղարկավորության ծախսերի հատուցում պահանջելու դեպքում՝ հուղարկավորության հետ կապված իր կողմից կատարված ծախսերը հաստատող փաստաթղթեր,

5) կերակրողին կորցնելու հետ կապված վնասի հատուցման չափը հավաստող փաստաթղթեր (եթե պահանջվում է հատուցել կերակրողին կորցնելու հետ կապված ծախսերը),

6) տուժողի հայեցողությամբ՝ վնասի չափը և ապահովադրի և (կամ) ավտոտրանսպորտային միջոցն օրինական հիմքով տիրապետող այլ անձի մեղավորությունը հավաստող այլ փաստաթղթեր:

19. Տուժողի գույքին պատճառված վնասների հատուցման պահանջ ներկայացվելու դեպքում ներկայացվում են՝

1) ավտոտրանսպորտային միջոցի, ինչպես նաև այլ գույքի վնասման (ոչնչացման) դեպքում՝ վնասի վերականգնման համար վճարման հաշիվներ, իսկ վճարումը արդեն կատարված լինելու դեպքերում՝ կատարված ծախսերը հիմնավորող փաստաթղթեր, մասնավորապես՝ գումարի վճարումը հավաստող բանկային կամ դրամարկղի մուտքի անդորրագրեր, բացառությամբ այն դեպքերի, երբ վնասի վերականգնման համար դեռևս ոչ մի գործողություն չի իրականացվել և ներկայացվել է տուժողի գրավոր

երաշխավորությունը առ այն, որ չի իրականացվի գույքի վերականգնումը մինչև Բյուրոյի կողմից վնասի գնահատման վերջնական եզրակացություն տրամադրելը,

2) Վնասված գույքի նկատմամբ տուժողի սեփականության իրավունքը հավաստող փաստաթուղթ (փաստաթղթեր),

3) ավտոտրանսպորտային միջոցի, ինչպես նաև այլ գույքի կորստի դեպքում՝ կորստի փաստը հավաստող փաստաթղթեր,

4) տուժողի հայեցողությամբ՝ վնասի չափը և ապահովադրի և (կամ) ավտոտրանսպորտային միջոցն օրինական հիմքով տիրապետող այլ անձի մեղավորությունը հավաստող այլ փաստաթղթեր:

20. Տուժողը (նրա իրավահաջորդը) սույն կանոնների 24-րդ կետով սահմանված դեպքերում հատուցում ստանալու համար դիմում է Բյուրո՝ լրացնելով համապատասխան դիմումը (համաձայն 2և 1-ի) և ներկայացնելով անհրաժեշտ փաստաթղթերը: Ընդ որում, տուժողը (նրա իրավահաջորդը) հատուցում ստանալու համապատասխան դիմումը կարող է Բյուրո ներկայացնել ցանկացած ապահովագրական ընկերության գլխամասային գրասենյակի, նրա մասնաճյուղի, ներկայացուցչության կամ գործակալի միջոցով:

21. Բյուրոն, ապահովագրական ընկերության գլխամասային գրասենյակը, նրա մասնաճյուղը, ներկայացուցչությունը կամ գործակալը տուժողի (նրա իրավահաջորդի) կողմից սույն կանոններով նախատեսված դիմումն ընդունելիս դիմումում կատարում են դիմումն ընդունողի (մասնավորապես դիմում ընդունող ապահովագրական ընկերության գլխամասային գրասենյակի, նրա մասնաճյուղի, ներկայացուցչության կամ գործակալի անվանումը և նրա անունից ընդունող անձի անունը ազգանունը և զբաղեցրած պաշտոնը) և դիմումի ստացման ամսաթվի վերաբերյալ նշում, ինչպես նաև տուժողի (նրա իրավահաջորդի) կողմից հատուցում ստանալու համար դիմելու օրը վերջինիս տրամադրում են հատուցում ստանալու համար սույն կանոններով նախատեսված այն փաստաթղթերի ցանկը (համաձայն 2և 2-ի), որոնք դեռևս տուժողի կամ նրա իրավահաջորդի կողմից չեն ներկայացվել՝ նշելով, որ բացակայող փաստաթղթերը պետք է ներկայացվեն Բյուրո՝ վերջինիս կողմից հատուցման գործընթացի հետագա կարգավորումն իրականացնելու համար:

22. Դիմումը ստորագրվում է երկկողմանի՝ դիմումատուի և դիմումն ընդունողի կողմից, այնուհետև ներկայացված դիմումը պատճենահանվում է: Դիմումի պատճենը տրվում է դիմումատուին: Դիմումը ապահովագրական ընկերությունների գլխամասային գրասենյակների, դրանց մասնաճյուղերի, ներկայացուցչությունների կամ գործակալների կողմից ընդունվելու դեպքում դրա ստորագրված տարբերակը սքանավորվում է և նույն օրվա ընթացքում ուղարկվում է Բյուրոյի պաշտոնական էլեկտրոնային հասցեով: Դիմումն ընդունողը մեկ աշխատանքային օրվա ընթացքում հետպատասխան տեղեկացմամբ պատվիրված նամակով Բյուրոյին է ուղարկում նաև դիմումի և կից ներկայացված փաստաթղթերի բնօրինակները:

23. Բյուրոն տուժողի (իրավահաջորդի կողմից) հատուցում ստանալու վերաբերյալ դիմումն ստանալուց հետո՝ առավելագույնը 10 աշխատանքային օրվա ընթացքում, ապահովում է պատահարի առաջացման պատճառների և պատահարի արդյունքում տուժողին պատճառված վնասների փորձաքննությունը և փորձաքննության արդյունքների մասին իրազեկում տուժողին (նրա իրավահաջորդին), ապահովագրված անձին և ապահովադրին (առկայության դեպքում)՝ ուղարկելով այդ փորձաքննությունների վերաբերյալ փորձագետների եզրակացությունների (հաշվետվությունների) պատճենները և ծանուցման մեջ նշելով դրանք բողոքարկելու կարգը, ժամկետները և պայմանները: Սույն կետի համաձայն՝ հատուցում ստանալու վերաբերյալ դիմումը համարվում է ստացված սույն կանոններով սահմանված բոլոր փաստաթղթերը պատշաճ կերպով Բյուրոյի կողմից ստացվելու պահին:

ԳԼՈՒԽ 5

ԲՅՈՒՐՈՅԻ ԿՈՂՄԻՑ ՎՃԱՐՄԱՆ ԵՆԹԱԿԱ ՀԱՏՈՒՑՈՒՄՆԵՐԸ, ՀԱՏՈՒՑՄԱՆ ՄԵՐԺՄԱՆ ՀԻՄՔԵՐԸ, ՀԵՏԱԴԱՐՁ ՊԱՀԱՆՁԻ ԻՐԱՎՈՒՆՔԸ

24. Բյուրոն Երաշխավորման ֆոնդի միջոցների հաշվին հատուցում է տուժած անձանց պատճառված վնասները, այն դեպքում, երբ՝

1) վնաս պատճառած ավտոտրանսպորտային միջոցը կամ դրա վերաբերյալ ԱՊՊԱ պայմանագիր կնքելու պարտականություն ունեցող անձն անհայտ է: Այս դեպքում Բյուրոն Երաշխավորման ֆոնդի միջոցների հաշվին հատուցում է միայն տուժած անձանց պատճառված անձնական վնասները,

2) վնասը պատճառվել է այն ավտոտրանսպորտային միջոցի օգտագործմամբ, որի վերաբերյալ կնքված չէ ԱՊՊԱ պայմանագիր,

3) վնասը պատճառվել է հափշտակված կամ առանց հափշտակության նպատակի ապօրինաբար տիրացած ավտոտրանսպորտային միջոցի օգտագործմամբ,

4) վնաս պատճառած ավտոտրանսպորտային միջոցի վերաբերյալ ԱՊՊԱ պայմանագիր կնքած ապահովագրական ընկերությունը ճանաչվել է անվճարունակ (սնանկ), եթե նա Օրենքի համաձայն պարտավոր էր հատուցել պատճառված վնասը:

25. Բյուրոն մերժում է Երաշխավորման ֆոնդի միջոցների հաշվին վնասների հատուցման վճարումը, եթե՝

1) բացակայում են կամ վերացել են Երաշխավորման ֆոնդի միջոցների հաշվին Բյուրոյի կողմից հատուցման հիմքերը,

2) վնասը պատճառվել է այն ավտոտրանսպորտային միջոցի օգտագործումից, որը պարտադիր ապահովագրության ենթակա չէ,

3) վնասը պատճառվել է անհաղթահարելի ուժի (ֆորս մաժոր) հետևանքով առաջացած պատահարի հետևանքով,

4) վնասը պատճառվել է ահաբեկչական, ռազմական գործողությունների, խռովությունների կամ զանգվածային անկարգությունների հետևանքով առաջացած պատահարի արդյունքում,

5) վնասը պատճառվել է վտանգավոր թափոնների տեղափոխման ժամանակ և կապված է բացառապես վտանգավոր թափոնների հետ,

6) վնասը պատճառվել է տուժողի դիտավորության հետևանքով,

7) վնասը պատճառվել է պետական սեփականություն համարվող բուսական կամ կենդանական աշխարհին, օդին, մակերևութային կամ ստորգետնյա ջրերին, ընդերքին,

8) վնասը պատճառվել է արվեստի գործերին, թանկարժեք զարդերին, քարերին ու մետաղներին,

9) ապահովագրական հատուցումը ենթակա է վճարման ապահովագրական ընկերության կողմից,

10) օրենքով նախատեսված այլ դեպքերում:

26. Բյուրոն հետադարձ պահանջի իրավունք ունի հետևյալ դեպքերում՝

1) վնաս պատճառած ավտոտրանսպորտային միջոցը կամ դրա վերաբերյալ ԱՊՊԱ պայմանագիր կնքելու պարտականություն ունեցող անձն անհայտ է,

ա. այս դեպքում Բյուրոն հետադարձ պահանջի իրավունք ունի վնաս պատճառած անձի և վնաս պատճառած ավտոտրանսպորտային միջոցի սեփականատիրոջ նկատմամբ,

բ. եթե Բյուրոն բացահայտում է վնաս պատճառած ավտոտրանսպորտային միջոցի վերաբերյալ ԱՊՊԱ պայմանագիրը կնքած ապահովագրական ընկերությանը, ապա Բյուրոն հետադարձ պահանջի իրավունք է ձեռք բերում այդ ապահովագրական ընկերության նկատմամբ, եթե վերջինս օրենքի համաձայն պարտավոր է վճարել ապահովագրական հատուցում:

2) վնասը պատճառվել է այն ավտոտրանսպորտային միջոցի օգտագործմամբ, որի վերաբերյալ կնքված չէ ԱՊՊԱ պայմանագիր: Այս դեպքում Բյուրոն հետադարձ պահանջի իրավունք ունի վնաս պատճառած անձի և վնաս պատճառած ավտոտրանսպորտային միջոցի սեփականատիրոջ նկատմամբ,

3) վնասը պատճառվել է հափշտակված կամ առանց հափշտակության նպատակի ապօրինաբար տիրացած ավտոտրանսպորտային միջոցի օգտագործմամբ, որի դեպքում Բյուրոն հետադարձ պահանջի իրավունք ունի վնաս պատճառած անձի նկատմամբ:

27. Երաշխավորման ֆոնդի միջոցների հաշվին տուժած անձանց պատճառված վնասները հատուցվում են Օրենքի 8-րդ հոդվածով սահմանված գումարների առավելագույն չափի սահմաններում:

ԳԼՈՒԽ 6

**ԲՅՈՒՐՈՅԻ ԿՈՂՄԻՑ ՀԱՏՈՒՑՈՒՄՆԵՐԻ ԳՈՐԾԸՆԹԱՅԻ ՆԵՐՔԻՆ ԿԱՆՈՆԱԿԱՐԳՄԱՆԸ
ՆԵՐԿԱՅԱՑՎՈՂ ՊԱՀԱՆՁՆԵՐԸ**

28. ԱՊՊԱ ոլորտում Երաշխավորման ֆոնդի միջոցների հաշվին հատուցումների գործընթացը կանոնակարգելու նպատակով Բյուրոն սահմանում է ընթացակարգեր և այլ ներքին իրավական ակտեր, որոնցով առնվազն սահմանվում են՝

- 1) հատուցման գործընթացի մանրամասն նկարագրությունը, Բյուրոյի աշխատակիցների և ստորաբաժանումների պարտականությունները այս գործընթացում,
- 2) հատուցումը վճարելու կամ հատուցման վճարումը մերժելու որոշման ձևը, դրանում ներառվող տեղեկությունները,
- 3) լրացուցիչ և կրկնակի փորձաքննությունների նշանակման և անցկացման հետ կապված Բյուրոյի գործողությունները,
- 4) հատուցման վճարումը մերժելու և այն վճարելու ընթացակարգերը,
- 5) հատուցումներով պայմանավորված հետադարձ պահանջի (սուբրոգացիայի) իրավունքի առկայության դեպքում՝ Բյուրոյի կողմից նման պարտավորությունների հաշվառման և պարտավորությունների ստացմանն ուղղված գործողությունների կարգը:

29. Բյուրոյի՝ սույն կանոնների 28-րդ կետով նախատեսված այլ ներքին իրավական ակտերը պետք է հնարավորինս ամբողջական և մատչելի կերպով նկարագրեն ԱՊՊԱ ոլորտում Բյուրոյի կողմից հատուցումների վճարման հետ կապված գործընթացները՝ համապատասխան քայլերի տրամաբանական հաջորդականությամբ:

ԲԱԺԻՆ 4

ԳՈՒՅՔԻՆ ՊԱՏՃԱՌՎԱԾ ՎՆԱՄՆԵՐԻ ԵՎ ԱՆՁՆԱԿԱՆ ՎՆԱՄՆԵՐԻ ՀԵՏ ԿԱՊՎԱԾ ՀԱՏՈՒՑՈՒՄՆԵՐԻ ԿԱՐԳԱՎՈՐՄԱՆ ԱՌԱՆՁՆԱՀԱՏԿՈՒԹՅՈՒՆՆԵՐԸ

ԳԼՈՒԽ 7

ԳՈՒՅՔԻՆ ՊԱՏՃԱՌՎԱԾ ՎՆԱՄՆԵՐԻ ՀԵՏ ԿԱՊՎԱԾ ՀԱՏՈՒՑՈՒՄՆԵՐԻ ԿԱՐԳԱՎՈՐՄԱՆ ԱՌԱՆՁՆԱՀԱՏԿՈՒԹՅՈՒՆՆԵՐԸ

30. Պատահարում տուժողի ոչ դիտավորյալ մեղքի առկայության դեպքում նրա գույքին պատճառված փաստացի վնասը ենթակա է հատուցման այդ պատահարում իր մեղքի աստիճանին համամասնորեն նվազեցված չափով:

31. Սույն կանոնների 30-րդ կետով նախատեսված դեպքում պատահարում տուժողի մեղավորությունը գնահատվում է 50 տոկոսի չափով, եթե մեղավորության այլ աստիճան չի սահմանվել դատարանի՝ օրինական ուժի մեջ մտած որոշմամբ: Ընդ որում, գործն ըստ էության լուծող և օրինական ուժի մեջ մտած դատական ակտով պատահարում տուժողի 50 տոկոսից տարբերվող այլ մեղավորության աստիճան սահմանվելու կամ անմեղ ճանաչվելու կամ դիտավորյալ մեղքի առկայությունը հաստատվելու դեպքում հատուցում վճարած կողմը (Բյուրոն և ապահովագրական ընկերությունները) կատարում են համապատասխան չափով հատուցման վերահաշվարկներ՝ համապատասխանաբար ավել վճարված հատուցման չափով հետադարձ պահանջ ներկայացնելու և (կամ) պակաս վճարված հատուցումը լրացուցիչ վճարելու միջոցով: Սույն կետով նախատեսված

դատական ակտերի ընդունման մասին տեղեկացված կողմերը դրանց մասին ծանուցում են դատական գործընթացին չներգրավված կողմին, որոնց համար այդ դատական ակտի ընդունման արդյունքում առաջանում է հետադարձ պահանջ ներկայացնելու կամ համապատասխան փոխհաշվարկներ կատարելու իրավունք կամ պարտավորություն:

32. Տուժողը (նրա իրավահաջորդը), պատահարի հետևանքով իր գույքին պատճառված վնասի հատուցման գործընթացում, հատուցման ստացման ձևի (համապատասխան գումար ստանալու կամ պատճառված վնասի վերականգնման միջոցով) ընտրությունն իրականացնում է Բյուրոյի կողմից հատուցում վճարելու որոշումն ստանալուց հետո՝ 2 աշխատանքային օրվա ընթացքում: Սույն կետով սահմանված ժամկետում տուժողի կողմից համապատասխան ընտրություն չկատարվելու դեպքում համարվում է, որ տուժողն ընտրել է համապատասխան գումար վճարելու եղանակը: Բյուրոն հատուցում վճարելու որոշումը տուժողին ուղարկելիս ծանուցում է սույն կետով սահմանված իրավունքի իրականացման ժամկետի, կարգի և դրա չիրականացման հետևանքի, ինչպես նաև սույն կանոնների 34-րդ կետով նախատեսված պարտականության (դրա առկայության դեպքում) մասին:

33. Սույն կանոնների 32-րդ կետով նախատեսված ընտրության դիմումը ներկայացվում է գրավոր ձևով՝ տուժողի (նրա իրավահաջորդի) կամ նրա ներկայացուցչի ստորագրությամբ: Ընդ որում, համապատասխան գումար վճարելու ձևով վնասների հատուցման տարբերակն ընտրվելու դեպքում Բյուրոն հատուցվող գումարը տուժողին (նրա իրավահաջորդին) տրամադրում է անկանխիկ եղանակով՝ սույն կանոնների 16-րդ կետի 1-ին ենթակետով սահմանված դիմումում նշված բանկային հաշվի համարով կամ բանկային փոխանցման միջոցով:

34. Պատահարի հետևանքով գույքին պատճառված վնասի վերականգնման տարբերակը ընտրվելու դեպքում տուժողը (նրա իրավահաջորդը) կամ որևէ երրորդ անձ պետք է գրավոր պարտավորություն ստանձնի լրավճարելու վնասի վերականգնման համար՝ հատուցման ենթակա գումարի չբավարարող մասով, եթե՝

1) վնասի վերականգնման գումարը գերազանցում է Օրենքի 8-րդ հոդվածով սահմանված վճարման ենթակա գումարի առավելագույն սահմանաչափը, կամ

2) տուժողը (նրա իրավահաջորդը) ցանկանում է գույքի վերանորոգման համար օգտագործել գործարանային դետալներ, հանգույցներ, ագրեգատներ, որոնց զծով համապատասխան փորձագետը վնասը գնահատելիս Բյուրոյի կողմից սահմանված կանոններին համապատասխան հաշվարկել է մաշվածություն, կամ

3) հատուցումը հաշվարկվել է սույն կանոնների 30-րդ կետով նախատեսված կարգով:

35. Տուժողի (նրա իրավահաջորդի) կամ այլ անձի կողմից սույն կանոնների 34-րդ կետով նախատեսված պարտավորությունը չստանձնելու դեպքում սույն կանոնների 34-րդ կետով նախատեսված վնասների վերականգնումը գնահատվում է որպես ոչ ողջամիտ և

տուժողին (նրա իրավահաջորդին) պատճառված վնասները հատուցվում են համապատասխան գումար վճարելու միջոցով: Գույքին պատճառված վնասի վերականգնման գործընթացն իրականացվում է Օրենքով և Բյուրոյի կանոններով սահմանված կարգով:

ԳԼՈՒԽ 8

ՏՈՒԺՈՂՆԵՐԻ ԱՌՈՂՋՈՒԹՅԱՆԸ ՊԱՏՃԱՌՎԱԾ ՎՆԱՍՆԵՐԻ ՀԵՏ ԿԱՊՎԱԾ

ՀԱՏՈՒՑՈՒՄՆԵՐԻ ԿԱՐԳԱՎՈՐՄԱՆ ԳՈՐԾԸՆԹԱՑԻ ԱՌԱՆՁՆԱՀԱՏԿՈՒԹՅՈՒՆՆԵՐԸ

36. Տուժողների առողջությանը պատճառված վնասի համար հատուցումը Օրենքով, սույն կանոններով և Բյուրոյի այլ ներքին իրավական ակտերով սահմանված կարգով վճարվում է անմիջապես բժշկական հաստատությանը՝ բացառությամբ Օրենքով և սույն կանոններով նախատեսված դեպքերի:

37. Բյուրոն տուժողների առողջությանը պատճառված վնասի գծով առաջնային բուժօգնության ցուցաբերման հետ կապված հատուցումների կարգավորման գործընթացում համագործակցում է Հայաստանի Հանրապետությունում արտոնագրված բոլոր բժշկական հաստատությունների հետ և առաջնային բուժօգնության ցուցաբերման հետ կապված հատուցումներն իրականացնելիս հիմք է ընդունում նրանց կողմից տրված՝ սույն կանոններով նախատեսված փաստաթղթերը:

38. Բյուրոն տուժողների առողջությանը պատճառված վնասների հետ կապված հատուցումների կարգավորման գործընթացում առաջնորդվում է Օրենքով, և սույն կանոններով սահմանված պահանջներով, ինչպես նաև Հանձնաժողովի առաջարկությամբ՝ Բյուրոյի խորհրդի կողմից հաստատած հատուցման ենթակա ծախսերի անհրաժեշտության, հիմնավորվածության և փաստացի ապացուցվածության չափանիշներով:

39. ԱՊՊԱ ոլորտում Բյուրոյի համար գործում է տուժողներին բժշկական օգնություն ցուցաբերելու և առողջությունը վերականգնելու հետ կապված ծախսերի նախնական հատուցման համակարգ այն դեպքերում, երբ դեռևս որոշում չի կայացվել հատուցում վճարելու կամ հատուցման վճարումը մերժելու մասին:

40. Նախնական հատուցման համակարգը գործում է հետևյալ սկզբունքների հիման վրա և հետևյալ առավելագույն սահմանաչափերով.

1) Բյուրոն որևէ շահագրգիռ անձի կողմից գրավոր կերպով պատահարի մասին տեղեկացվելու պահից սկսած նախնական հատուցման միջոցով ապահովում է պատահարում ներգրավված անձանց առողջությանը պատահարի հետևանքով պատճառված վնասի գծով բժշկական օգնության ցուցաբերման և առողջության վերականգնման հետ կապված ծախսերի հատուցումը, եթե տվյալ պատահարում ներգրավված ոչ մի ավտոտրանսպորտային միջոցի համար առկա չէ գործող ԱՊՊԱ պայմանագիր,

2) սույն կետով սահմանված նախնական հատուցման համակարգը չի գործում սույն կանոնների 25-րդ կետով սահմանված վնասների մասով, ինչպես նաև այն անձանց նկատմամբ, ովքեր Օրենքի 26-րդ հոդվածի համաձայն՝ ապահովագրական հատուցում ստանալու իրավունքից չեն օգտվում,

3) նախնական հատուցման համակարգի դեպքում հատուցումները Բյուրոյի կողմից իրականացվում են միայն համապատասխան բժշկական հաստատությանը՝ վերջինիս կողմից ներկայացված վճարման հաշիվների կամ տվյալ տուժողին բժշկական ծառայությունների մատուցման համար անհրաժեշտ վճարի չափը հավաստող այլ փաստաթղթերի հիման վրա,

նախնական հատուցումներն իրականացվում են յուրաքանչյուր տուժողի գծով առաջին բժշկական օգնություն ցույց տալու, բժշկական կամ վերականգնողական հաստատություններ տեղափոխելու, բժշկական կամ վերականգնողական հաստատություններում պահելու, ախտորոշման, բուժման և առողջության վերականգնման համար անհրաժեշտ ծախսերի չափով, բայց ոչ ավել քան յուրաքանչյուր տուժողի գծով 250.000 Հայաստանի Հանրապետության դրամ գումարը և մեկ պատահարի գծով ընդհանուր առմամբ ոչ ավելի, քան անձնական վնասների գծով Օրենքով նախատեսված մեկ պատահարի համար սահմանված հատուցման ենթակա առավելագույն չափի և տվյալ պատահարին մասնակից ավտոտրանսպորտային միջոցների քանակի հարաբերության արդյունքում ստացված գումարի չափը: Բյուրոն իր հայեցողությամբ կարող է ավելի մեծ կանխավճարներ կատարել, բայց յուրաքանչյուր տուժողի համար՝ ոչ ավելի, քան 750.000 ՀՀ դրամը:

41. Պատահարի վերաբերյալ փորձաքննության (ներառյալ՝ լրացուցիչ և կրկնակի) արդյունքներով (պատահարի հետ կապված քաղաքացիական, քրեական կամ դատական կարգով վարչական գործ հարուցված լինելու դեպքում՝ օրինական ուժի մեջ մտած համապատասխան դատական ակտի հիման վրա) Բյուրոյի կողմից հատուցում վճարելու վերաբերյալ որոշում կայացվելուց հետո Բյուրոն Օրենքով, սույն կանոններով և Բյուրոյի այլ կանոններով սահմանված կարգով տուժողին (նրա իրավահաջորդին) վճարում է հատուցումը՝ հատուցվող գումարից մասհանելով արդեն տրված նախնական հատուցման գումարները:

42. Բյուրոն Օրենքով նախատեսված դեպքում և կարգով հետադարձ պահանջի իրավունք է ձեռքբերում Օրենքով նախատեսված անձանց՝ ներառյալ պատահարի տեղի ունենալու մեջ մեղավոր տուժողների նկատմամբ:

43. Անմիջապես տուժողին (նրա իրավահաջորդին) կամ նրա լիազորված անձին վճարվում են տուժողի առողջությանը պատճառված վնասի հետ կապված Օրենքի և Բյուրոյի կանոնների համաձայն հատուցման ենթակա հետևյալ ծախսերը՝

1) Օրենքի 12-րդ հոդվածի 6-8-րդ մասերով նախատեսված ծախսերը,

2) բժշկի ցուցումով բուժման շարունակականության ապահովմանն ուղղված միջոցառումների, դեղեր ձեռք բերելու, պրոթեզավորման, անվասայլակի, տեխնիկական այլ միջոցների ձեռքբերման հետ կապված ծախսերը,

3) տուժողի բուժումը կամ առողջության վերականգնումը տնային պայմաններում իրականացնելու հետ կապված ծախսերը,

4) տուժողի բուժման կամ առողջության վերականգնման համար տուժողի կամ այլ անձի կողմից արդեն իսկ կատարված ծախսերը:

44. Տուժողների առողջությանը պատճառված վնասների հետ կապված հաստուցումների կարգավորման գործընթացում սահմանվում են Օրենքով սահմանված՝ բժշկական հաստատությունների կողմից տրվող փաստաթղթերի նկատմամբ հետևյալ նվազագույն պահանջները (որպես հաստուցման ենթակա ծախսերի անհրաժեշտության, հիմնավորվածության և փաստացի ապացուցվածության չափանիշներ)՝

1) տուժողի ամբուլատոր քարտից քաղվածքը և կոնսուլտացիոն եզրակացությունը, որը պետք է պարունակի առնվազն հետևյալ տեղեկատվությունը՝

ա. հիվանդի անունը, ազգանունը, ծննդյան տարեթիվը,

բ. բժշկական հաստատություն դիմելու ամսաթիվը,

գ. կատարված գործիքային և լաբորատոր հետազոտությունները,

դ. կլինիկական ախտորոշումը,

ե. ցուցաբերած օգնությունը (առաջին բժշկական օգնություն, միջամտություն, նշանակված դեղորայքի քանակը և դեղաչափը):

2) ստացիոնար բուժման դեպքում էպիկրիզը, որը պետք է պարունակի առնվազն հետևյալ տեղեկատվությունը՝

ա. ստացիոնարում գտնվելու տևողությունը,

բ. կատարված վիրահատական և կոնսերվատիվ բուժումը,

գ. հետստացիոնար խորհուրդները (վերականգնողական, ռեաբիլիտացիոն բուժում, հսկողություն, տնային աջակցության պարագաներ),

3) վնասի չափը հիմնավորող փաստաթղթերը, որը պետք է պարունակի առնվազն հետևյալ տեղեկատվությունը՝

ա. բժշկական հաստատությունների կողմից տրվող վճարման հաշիվները, որոնք պետք է ստորագրված լինեն բժշկական հաստատության ղեկավարի (նրա կողմից լիազորված անձի) և գլխավոր հաշվապահի կողմից՝ հաստատված բժշկական հաստատության կնիքով, կամ

բ. տուժողի կողմից գումարն արդեն վճարված լինելու դեպքում՝ վճարման հաշիվ և դրամարկղային ֆիսկալային կտրոն կամ դրամարկղի մուտքի օրդեր (կանխիկ վճարման դեպքում) կամ բանկային փոխանցման անդորրագիր (անկանխիկ վճարման դեպքում):

ԳԼՈՒԽ 9

**ՏՈՒԺՈՂՆԵՐԻ ԱՌՈՂՋՈՒԹՅԱՆԸ ՊԱՏՃԱՌՎԱԾ ՎՆԱՍԻ ՀԵՏԵՎԱՆՔՈՎ ԿՈՐՑՐԱԾ
ԱՇԽԱՏԱՎԱՐՁԻ (ԵԿԱՄՈՒՏՆԵՐԻ) ՀԱՇՎԱՐԿՄԱՆ ՄԵԹՈՂԱԲԱՆՈՒԹՅՈՒՆԸ ԵՎ
ՎՃԱՐՄԱՆ ԿԱՐԳԸ**

45. Տուժողի կորցրած աշխատավարձի (եկամուտի) հատուցման ենթակա չափը որոշվում է միջին աշխատավարձից (եկամտից) տոկոսներով, որը նա ստացել է մինչև հաշմուքությունը կամ առողջության այլ վնասվածքը կամ աշխատունակության կորուստը: Այդ տոկոսները որոշվում են տուժողի կողմից մասնագիտական աշխատունակության կորստի, իսկ մասնագիտական աշխատունակության բացակայության դեպքում՝ ընդհանուր աշխատունակության կորստի աստիճանին համապատասխան:

46. Մասնակիորեն աշխատունակությունը կորցրած տուժողի վնասի հատուցման չափը ենթակա է համապատասխան մեծացման, եթե տուժողի աշխատունակությունը հետագայում նվազել է՝ կապված առողջությանը պատճառված վնասի հետ, համեմատած այն աշխատունակության հետ, որ նրա մոտ մնացել էր իրեն վնասի հատուցման մասին որոշում կայացվելու պահին:

47. Աշխատունակությունը կորցրած տուժողի վնասի հատուցման չափը ենթակա է համապատասխան նվազեցման, եթե տուժողի աշխատունակությունը վնասի հատուցման մասին որոշում կայացվելու պահի համեմատ աճել է:

48. Սույն կանոնների 45-րդ կետով սահմանված դեպքում տուժողի կորցրած աշխատավարձի (եկամտի) կազմում ներառվում են նրա ինչպես հիմնական, այնպես էլ համատեղությամբ կատարված աշխատանքի՝ եկամտահարկով հարկվող աշխատանքային և քաղաքացիական իրավական պայմանագրերով վարձատրության բոլոր վճարները: Հաշվի չեն առնվում միանվագ բնույթի վճարները, մասնավորապես, չօգտագործված արձակուրդի փոխհատուցումը և արձակման նպաստը: Ժամանակավոր անաշխատունակության կամ հղիության և ծննդաբերության համար արձակուրդի ժամանակաշրջանի համար հաշվի է առնվում վճարված նպաստը: Ձեռնարկատիրական գործունեությունից ստացված եկամուտները, ինչպես նաև հեղինակային հոնորարը ներառվում են կորցրած աշխատավարձի կազմում, ընդ որում ձեռնարկատիրական գործունեությունից եկամուտները ներառվում են հարկային մարմինների տվյալների հիման վրա:

49. Աշխատավարձի (եկամտի) բոլոր տեսակները հաշվի են առնվում մինչև հարկային պահումները եղած չափով:

50. Տուժողի ամսական միջին աշխատավարձը (եկամուտը) հաշվարկվում է առողջությանը վնաս պատճառելուն նախորդած տասներկու ամսվա նրա աշխատավարձը (եկամուտը) տասներկու մասի բաժանելու միջոցով: Այն դեպքում, երբ տուժողը վնաս պատճառելու ժամանակ աշխատել է տասներկու ամսից պակաս, նրա ամսական միջին աշխատավարձը (եկամուտը) հաշվարկվում է փաստացի աշխատած ամիսների աշխատավարձի (եկամտի) ընդհանուր գումարն այդ ամիսների թվի վրա բաժանելով:

51. Տուժողի ցանկությամբ ոչ լրիվ աշխատած ամիսները փոխարինվում են լրիվ աշխատած նախորդ ամիսներով, իսկ դրանց փոխարինման անհնարինության դեպքում՝ հանվում են հաշվարկից:

52. Այն դեպքում, երբ վնաս պատճառելու պահին տուժողը չի աշխատել, նրա ցանկությամբ հաշվարկվում է նրա՝ մինչև աշխատանքից ազատվելու աշխատավարձը, կամ հաշվարկի հիմքում դրվում է տվյալ վայրում նրա որակավորմամբ աշխատողի վարձատրության սովորական չափը, որը սակայն չի կարող պակաս լինել Հայաստանի Հանրապետությունում օրենքով սահմանված նվազագույն ամսական աշխատավարձի հնգապատիկից:

53. Եթե մինչև տուժողին հաշմություն կամ նրա առողջությանն այլ վնաս պատճառելը նրա աշխատավարձում (եկամտում) կատարվել են նրա գույքային դրությունը բարելավող կայուն փոփոխություններ (բարձրացել է զբաղեցրած պաշտոնի աշխատավարձը, տուժողը փոխադրվել է ավելի բարձր վարձատրվող աշխատանքի կամ ցերեկային ուսուցմամբ ուսումնական հաստատությունն ավարտելուց հետո ընդունվել է աշխատանքի և այլ դեպքերում, երբ ապացուցվել է տուժողի աշխատանքի վարձատրության կայուն փոփոխությունը կամ փոփոխության հնարավորությունը), նրա ամսական միջին աշխատավարձը (եկամուտը) որոշելիս հաշվի է առնվում միայն այն աշխատավարձը (եկամուտը), որը նա ստացել է կամ կարող էր ստանալ համապատասխան փոփոխությունից հետո:

54. Կորցրած աշխատավարձը (եկամուտը) սահմանելիս տուժողին հաշմության կամ առողջության այլ վնասի հետ կապված նշանակված հաշմանդամության կենսաթոշակը, ինչպես նաև այլ կենսաթոշակներն ու նպաստները և այլ նմանօրինակ վճարները, որոնք նշանակվել են առողջության քայքայումից առաջ կամ հետո, հաշվի չեն առնվում ու չեն հանգեցնում վնասի հատուցման չափի նվազեցման (հաշվի չեն առնվում ի հաշիվ վնասի հատուցման): Վնասը հատուցելիս հաշվի չի առնվում նաև տուժողի կողմից առողջության քայքայումից հետո ստացած աշխատավարձը (եկամուտը):

55. 14 տարեկան չդարձած անչափահասին, որը չունի աշխատավարձ (եկամուտ), հաշմություն կամ նրա առողջությանն այլ վնաս պատճառելու դեպքում կորցրած աշխատավարձի (եկամտի) հատուցում չի վճարվում:

56. Սույն կանոնների 55-րդ կետով նախատեսված անչափահասի 14 տարեկան դառնալուց հետո, ինչպես նաև 14 տարեկանից մինչև 18 տարեկան հասակի անչափահասի, որը չունի աշխատանք (եկամուտ), առողջությանը վնաս պատճառելու դեպքում, ենթակա է հատուցման նրա աշխատունակության կորստի կամ նվազեցման հետ կապված վնասը՝ ելնելով Հայաստանի Հանրապետությունում օրենքով սահմանված նվազագույն ամսական աշխատավարձի հնգապատիկի չափից:

57. Եթե առողջությանը վնաս հասցվելու ժամանակ անչափահասն ունեցել է աշխատավարձ, ապա վնասը հատուցվում է՝ ելնելով այդ աշխատավարձի չափից, որը

սակայն չի կարող պակաս լինել Հայաստանի Հանրապետությունում օրենքով սահմանված նվազագույն ամսական աշխատավարձի հնգապատիկից:

58. Անչափահասը, որի առողջությանը նախկինում վնաս է պատճառվել, աշխատանքային գործունեությունն սկսելուց հետո իրավունք ունի, ելնելով իր ստացած աշխատավարձից, պահանջել վնասի հատուցման չափի մեծացում, սակայն իր զբաղեցրած պաշտոնի համար սահմանված վարձատրությունից կամ իր աշխատատեղի նույն որակավորման աշխատողի աշխատավարձից ոչ ավելի չափով:

59. Տուժողի առողջությանը պատճառված վնասի հետևանքով կորցրած աշխատավարձի (եկամուտի) հատուցման ենթակա գումարը կյանքի թանկացման դեպքում, օրենքով սահմանված կարգով, ինդեքսավորվում է, իսկ նվազագույն աշխատավարձի չափը բարձրանալու դեպքում մեծանում է աշխատավարձի նվազագույն չափի բարձրացմանը համամասնորեն:

60. Կորցրած աշխատավարձի (եկամուտի) հատուցումը կատարվում է ամենամսյա վճարներով:

ԳԼՈՒԽ 10

ՏՈՒԺՈՂԻ ՄԱՀՎԱՆ ՀԵՏ ԿԱՊՎԱԾ ՀԱՏՈՒԳՈՒՄՆԵՐԻ ԿԱՐԳԱՎՈՐՄԱՆ ԳՈՐԾՆԹԱՅԻ ԱՌԱՆՁՆԱՀԱՏԿՈՒԹՅՈՒՆՆԵՐԸ

61. Տուժողի մահվան դեպքում հատուցվում է տուժողի մահվան հետևանքով վնասների հատուցման իրավունք ունեցող անձանց կրած վնասները:

62. Տուժողի մահվան հետևանքով վնասների հատուցման իրավունք ունեցող անձինք են՝

1) *Կերակրողին կորցրած անձինք, այն է՝*

ա. տուժողի խնամքի ներքո գտնվող կամ նրա մահվան օրը նրանից խնամք ստանալու իրավունք ունեցող անաշխատունակ անձինք,

բ. տուժողի մահվանից հետո ծնված նրա երեխան,

գ. տուժողի ծնողներից մեկը, ամուսինը կամ ընտանիքի անդամը՝ անկախ նրա աշխատունակությունից, որը չի աշխատում և զբաղված է տուժողի խնամքի ներքո գտնվող նրա 14 տարեկան չդարձած կամ թեկուզև նշված տարիքին հասած, սակայն բժշկական մարմինների եզրակացությամբ իր առողջական վիճակով կողմնակի խնամքի կարիք ունեցող երեխաների, թոռների, եղբայրների և քույրերի խնամքով,

դ. տուժողի խնամքի ներքո գտնվող և նրա մահվանից հետո՝ 5 տարվա ընթացքում, անաշխատունակ դարձած անձինք:

տուժողի հուղարկավորության հետ կապված անհրաժեշտ ծախսերը կատարած անձինք:

Եթե մինչև տուժողի մահը նրան հատուցվել են իր առողջությանը պատճառված վնասների հետ կապված ծախսերը և (կամ) առողջությանը պատճառված վնասների հետևանքով կորցրած աշխատավարձը (եկամուտները), ապա տուժողի հուղարկավորու-

թյան հետ կապված անհրաժեշտ և հիմնավորված ծախսերը կատարած անձանց տուժողի հուղարկավորության հետ կապված ծախսերը վճարվում են ոչ ավելի, քան՝ Օրենքով ըստ յուրաքանչյուր տուժողի համար սահմանված ապահովագրական գումարի և արդեն կատարված հատուցման չափի տարբերությունն է:

63. Կերակրողին կորցրած անձանց վնասը հատուցվում է տուժողի՝ սույն կանոնների 48-53-րդ կետերով սահմանված կարգով հաշվարկված աշխատավարձի (եկամտի) (ներառյալ՝ կենսաթոշակի և այլ նմանօրինակ վճարների) այն մասի չափով, որը վերջինի կենդանության օրոք նրանք ստանում էին կամ ստանալու իրավունք ունեին իրենց ապրուստի համար: Ընդ որում, հատուցման չափը որոշելիս հաշվի չի առնվում կերակրողին կորցրած անձանց կողմից ստացվող ցանկացած եկամուտը՝ ներառյալ այն կենսաթոշակը և թոշակի այլ տեսակները, որոնք նրանք ստանում են՝ կապված կերակրողին կորցնելու հետ:

64. Կերակրողին կորցրած անձանց պատճառված վնասի հատուցման գումարը կյանքի թանկացման դեպքում, օրենքով սահմանված կարգով, ինդեքսավորվում է, իսկ նվազագույն աշխատավարձի չափը բարձրանալու դեպքում մեծանում է աշխատավարձի նվազագույն չափի բարձրացմանը համամասնորեն:

65. Կերակրողի մահվան հետ կապված վնասի հատուցման իրավունք ունեցող յուրաքանչյուր անձի համար սահմանված հատուցման չափը ենթակա չէ վերահաշվարկի, բացառությամբ հետևյալ դեպքերի՝

- 1) երեխայի ծնունդը կերակրողի մահվանից հետո,
- 2) մահացած կերակրողի երեխաների, թոռների, եղբայրների և քույրերի խնամքով զբաղված անձանց հատուցման վճարի նշանակումը և դադարումը:

66. Կերակրողին կորցրած անձանց վնասը հատուցվում է ամենամսյա վճարումների տեսքով հետևյալ ժամկետներում՝

- 1) անչափահասներին՝ մինչև 18 տարեկան դառնալը,
- 2) 18 տարեկանից բարձր տարիքի սովորողներին՝ մինչև ցերեկային ուսուցման ձևով ուսումնական հաստատություններում ուսման ավարտը, սակայն ոչ ավելի, քան մինչև 23 տարեկան դառնալը,
- 3) 55 տարեկանից մեծ կանանց և 60 տարեկանից մեծ տղամարդկանց՝ ցմահ,
- 4) հաշմանդամներին՝ հաշմանդամության ժամանակ,
- 5) ծնողներից մեկին, ամուսնուն կամ ընտանիքի այլ անդամին, որն զբաղված է մահացածի խնամքի տակ գտնվող նրա երեխաների, թոռների, եղբայրների և քույրերի խնամքով՝ մինչև վերջիններիս 14 տարեկան դառնալը, իսկ այդ ընթացքում անաշխատունակ դառնալու դեպքում՝ նաև խնամքի ավարտից հետո:

67. Բոլոր դեպքերում, հատուցման վճարումը դադարեցվում է, եթե սպառվել է Օրենքով նախատեսված հատուցման ենթակա առավելագույն չափը: Ընդ որում, այդ հաշվարկի մեջ ընդգրկվում են սովյալ տուժողի մահվան հետևանքով բոլոր աձանց

վճարված հատուցումները, ինչպես նաև հենց տուժողին մինչև նրա մահը հատուցված գումարները՝ կապված տվյալ պատահարի հետևանքով նրա առողջությանը վնաս պատճառվելու և (կամ) աշխատավարձ (եկամուտ) կորցնելու հետ:

ԳԼՈՒԽ 11

ԱՆՑՈՒՄԱՅԻՆ ԴՐՈՒՅԹՆԵՐ

68. Ապահովագրական ընկերությունները իրենց անունից հանդես եկող ապահովագրական հատուցումների կարգավորման իրավասությամբ օժտված այլ անձանց (գործակալների) ցանկը Բյուրո են ներկայացնում մինչև 2011 թվականի հունվարի 20-ը, իսկ դրանում կատարված յուրաքանչյուր փոփոխության վերաբերյալ՝ 5 աշխատանքային օրվա ժամկետում տեղեկացնում են Բյուրո:

Պատահարի տեղի ունենալու ամսաթիվ, ժամ և վայր	Ամսաթիվ՝ ____/____/____ ժամ՝ ____:____ վայր _____ <small>oo սա տտ ժամ րոպե պատահարի տեղի ունենալու կոնկրետ վայրը</small>
---	---

3. ՏԵՂԵԿՈՒԹՅՈՒՆՆԵՐ ՎՆԱՍԻ ՎԵՐԱԲԵՐՅԱԼ

Պատահարի հետևանքով պատճառված վնասները	<input type="checkbox"/> գույքին պատճառված վնասներ
	<input type="checkbox"/> առողջությանը պատճառված վնասներ (այդ թվում՝ կորցրած աշխատավարձ, եկամուտ)
	<input type="checkbox"/> մահ

Վնասի մոտավոր մեծություն (եթե դիմումը տրամադրելու պահին առկա են որևէ տվյալներ)	գույքին պատճառված վնասների համար՝ <input type="text"/> ՀՀ դրամ առողջությանը պատճառված վնասների համար՝ <input type="text"/> ՀՀ դրամ մահվան համար՝ <input type="text"/> ՀՀ դրամ Ընդամենը՝ <input type="text"/> ՀՀ դրամ
--	---

Գույքին պատճառված վնասի փաստացի վիճակ	<input type="checkbox"/> վնասվել է <input type="radio"/> վնասի վերականգնման համար դեռևս ոչ մի գործողություն չի իրականացվել <input type="radio"/> վնասը վերականգնվել է ամբողջությամբ <input type="radio"/> վնասը վերականգնվել է մասնակիորեն Վնասված գույքի փաստացի գտնվելու հասցեն <input type="text"/>
	<input type="checkbox"/> կորել է <input type="checkbox"/> ոչնչացվել է

Մեկից ավելի գույքին պատճառված վնասի դեպքում դիմողը գույքին պատճառված վնասի փաստացի վիճակի վերաբերյալ տեղեկատվությունը յուրաքանչյուր գույքի համար համապատասխան դաշտը լրացնում է առանձին թղթի վրա՝ նշելով կից էջերի քանակը:

Առողջությանը պատճառված վնասի տեսակ	<input type="checkbox"/> բուժում և առողջության վերականգնում Բուժումը կատարվել է. <input type="radio"/> տնային պայմաններում <input type="radio"/> բժշկական հաստատությունում <input type="text"/> <small>բժշկական հաստատության անվանումը</small> <input type="checkbox"/> կորցրած աշխատավարձ (եկամուտ)
------------------------------------	---

Տուժողի մահվան կապակցությամբ վնասների հատուցում ստնալու հիմքը	<input type="checkbox"/> կերակրողին կորցրած անձ է <input type="radio"/> մահացածի խնամքի ներքո գտնվող անձ <input type="radio"/> մահացածի մահվանից հետո ծնված նրա երեխա <input type="radio"/> մահացածի խնամքի ներքո գտնվող անձի խնամքով զբաղվող ընտանիքի անդամ <input type="checkbox"/> թաղման ծախսերը կատարած անձ է
---	--

4. ԴԻՄՈՒՄՍԱՏՈՒԻ ԿՈՂՄԻՑ ՆԵՐԿԱՅԱՑՎԱԾ ՓԱՍՏԱԹՂԹԵՐԻ ՑԱՆԿ

1. _____(կից ____ էջ)
2. _____(կից ____ էջ)

3. _____(կից _____ էջ)
4. _____(կից _____ էջ)
5. _____(կից _____ էջ)
6. _____(կից _____ էջ)
7. _____(կից _____ էջ)

Հաստատում եմ, որ սույն դիմումով ներկայացված տվյալները ճիշտ են և համապատասխանում են իրականությանը: Հասկանում եմ, որ եթե դիմում եմ ներկայացնում, տրամադրելով կեղծ կամ ապակողմնորոշող տեղեկություններ, օգտագործելով կեղծ միջոցներ, չբացահայտելով էական փաստեր, այդ դեպքում սույն դիմումը կարող է մերժվել:

Ստացել եմ սույն դիմումի պատճենը, հատուցում ստանալու համար Բյուրո ներկայացվող փաստաթղթերի ցանկը, ինչպես նաև գիտակցում եմ, որ Բյուրոն կարող է պահանջել պատահարի արդյունքում պատճառված վնասները հիմնավորող այլ փաստաթղթեր:

Դիմում լրացնող՝

անուն, ազգանուն (անվանում)

ստորագրություն

ամսաթիվ

հեռախոսահամար

Եթե դիմում լրացնողը տուժող անձը (նրա իրավահաջորդը) չէ, ապա ներկայացում է նաև տուժողի կողմից լիազորված լինելու փաստը հավաստող փաստաթուղթ:

Դիմում ընդունող՝

անուն, ազգանուն , ընկերության անվանում, գրադեցրած պաշտոն

ստորագրություն

ամսաթիվ

հեռախոսահամար

**«Հայաստանի ավտոապահովագրողների բյուրո»
ԻԱՄ խորհրդի 29/12/2010թ թիվ 44-Լ որոշմամբ հաստատված հավելվածի**

ԴԻՄՈՒՄԻՆ ԿԻՑ ՆԵՐԿԱՅԱՑՎՈՂ ՓԱՍՏԱԹՂԹԵՐԻ ՑԱՆԿ

Ճանապարհային երթևեկության անվտանգության ապահովման համար պատասխանատու լիազոր մարմնի կողմից տվյալ պատահարի գծով կազմած արձանագրություն

առկա է առկա չէ

Բաց թողնված ժամկետը հարգելի ճանաչելու համար հիմնավորող փաստաթղթեր կամ այլ ապացույցներ (լրացվում է, եթե դիմումը ներկայացվել է պատահարից հետո երեք ամսից ավելի ուշ)

Գույքին պատճառված վնասների հատուցում ստանալու համար ներկայացվող փաստաթղթեր

> Վնասված գույքի նկատմամբ տուժողի սեփականության իրավունքը հավաստող փաստաթուղթ (փաստաթղթեր) կամ այլ ապացույցներ

առկա է առկա չէ

Երբ գույքը վնասվել է	<input type="checkbox"/> վնասի վերականգնման համար դեռևս ոչ մի գործողություն չի իրականացվել <ul style="list-style-type: none"> ▪ Հավաստում առ այն, որ չի իրականացվի գույքի վերականգնումը մինչև Բյուրոյի կողմից վնասի գնահատման վերջնական եզրակացություն տրամադրելը <input type="checkbox"/> առկա է <input type="checkbox"/> առկա չէ
Երբ գույքը կորել կամ ոչնչացվել է	<input type="checkbox"/> վնասը վերականգնվել է ամբողջությամբ կամ մասնակիորեն <ul style="list-style-type: none"> ▪ Գույքի վերականգնման համար վճարման ենթակա հաշիվներ կամ կատարած ծախսերը հիմնավորող փաստաթղթեր <input type="checkbox"/> առկա է <input type="checkbox"/> առկա չէ
Երբ գույքը կորել կամ ոչնչացվել է	<ul style="list-style-type: none"> ▪ գույքի կորստի կամ ոչնչացման փաստը հավաստող փաստաթղթեր <input type="checkbox"/> առկա է <input type="checkbox"/> առկա չէ

Առողջությանը պատճառված վնասների հատուցում ստանալու համար

<p>Երբ կատարվել է բուժում և առողջության վերականգնում բժշկական հաստատությունում</p>	<ul style="list-style-type: none"> ▪ դատաբժշկական (բժշկական) փորձաքննության ակտ (եզրակացություն) և (կամ) բժշկական տեղեկանք և (կամ) կոնսուլտացիոն եզրակացություն և (կամ) քաղվածք ամբուլատոր քարտից և (կամ) էպիկրիզ <ul style="list-style-type: none"> <input type="checkbox"/> առկա է <input type="checkbox"/> առկա չէ ▪ բժշկական հաստատությունների կողմից տրված վճարման հաշիվներ կամ ծախսերը հիմնավորող փաստաթղթեր <ul style="list-style-type: none"> <input type="checkbox"/> առկա է <input type="checkbox"/> առկա չէ
<p>Երբ բուժումը կատարվել է տնային պայմաններում</p>	<ul style="list-style-type: none"> ▪ առողջության վերականգնումը տնային պայմաններում իրականացնելու հետ կապված ծախսերը հիմնավորող փաստաթղթեր, <ul style="list-style-type: none"> <input type="checkbox"/> առկա է <input type="checkbox"/> առկա չէ
<p>Երբ առկա է աշխատավարձի (եկամտի) կորուստ</p>	<ul style="list-style-type: none"> ▪ կորցրած աշխատավարձի (եկամուտների) չափը հաստատող փաստաթղթեր, <ul style="list-style-type: none"> <input type="checkbox"/> առկա է <input type="checkbox"/> առկա չէ
<p>Մահվան հետ կապված կատարած ծախսերի հատուցում ստանալու համար</p>	
<ul style="list-style-type: none"> ➢ դատաբժշկական (բժշկական) փորձաքննության ակտ (եզրակացություն), <ul style="list-style-type: none"> <input type="checkbox"/> առկա է <input type="checkbox"/> առկա չէ ➢ մահվան վկայական, <ul style="list-style-type: none"> <input type="checkbox"/> առկա է <input type="checkbox"/> առկա չէ 	
<p>Երբ դիմողը կերակրողին կորցրած անձ է</p>	<ul style="list-style-type: none"> ▪ կերակրողին կորցնող անձ համարվելու փաստը հավաստող փաստաթղթեր <ul style="list-style-type: none"> <input type="checkbox"/> առկա է <input type="checkbox"/> առկա չէ ▪ կերակրողին կորցնելու հետ կապված վնասի հատուցման չափը հավաստող փաստաթղթեր <ul style="list-style-type: none"> <input type="checkbox"/> առկա է <input type="checkbox"/> առկա չէ
<p>Երբ դիմողը մահացածի թաղման ծախսերը կատարած անձ է</p>	<ul style="list-style-type: none"> ▪ հուղարկավորության հետ կապված իր կողմից կատարված ծախսերը հաստատող փաստաթղթեր <ul style="list-style-type: none"> <input type="checkbox"/> առկա է <input type="checkbox"/> առկա չէ
<p>✓ Բյուրոն կքննի միայն այն վնասների հետ կապված պահանջները, որոնց համար կներկայացվեն բոլոր անհրաժեշտ փաստաթղթերը: Դիմումի հետ բոլոր փաստաթղթերը չներկայացվելու դեպքում դրանք կարող են ներկայացվել ավելի ուշ:</p>	